

Adroddiad Estyn 2023

Mae Ysgol Garth Olwg yn dathlu adroddiad cadarnhaol iawn gan Estyn yn dilyn arolwg llawn o'r ysgol ym mis Mawrth 2023. Llongyfarchiadau mawr i holl randdeiliaid yr ysgol.

Sylwadau gan Gadeirydd y Corff Llywodraethol, Mrs Julie Barton:

Mae'r blynyddoedd diwethaf wedi bod yn gyfnod heriol i bob un ohonom sy'n ymwneud â'n hysgolion, a hoffwn dalu teyrnged i'r staff, disgyblion, rhieni a llywodraethwyr am eu gwaith caled, eu hymroddiad a'u brwdfrydedd sydd wedi arwain at y sefyllfa gref sydd gennym heddiw. Yn benodol, mae'r Tîm Arwain a'r Prifathro, Mr Edwards, wedi gweithio'n ddiflino i sicrhau ein bod yn gwneud ein gorau bob amser.

Mae'r disgyblion bob amser wrth galon popeth a wnawn, felly roeddwn yn arbennig o falch o ddarllen bod 'ansawdd yr addysgu ar draws yr ysgol yn dda ac mae hyn yn cael effaith gadarnhaol ar gynnydd disgyblion yn eu gwybodaeth bynciol a llythrennedd'. Edrychwn ymlaen at sicrhau bod y safonau uchel hyn yn parhau ac yn gwellu. Byddwn nawr yn gweithio'n agos gyda'r staff a'r disgyblion i weithredu'r holl argymhellion o fewn yr adroddiad hwn. Llongyfarchiadau mawr i Ysgol Garth Olwg!

Sylwadau gan y Prifathro, Mr Trystan Edwards:

Rwy'n hynod o falch o'r ysgol ac mae hwn yn benllanw dros bedair mlynedd o waith caled i sefydlu'r ysgol arbennig hon. Rydym wedi profi fod Ysgol Garth Olwg yn gweithredu fel gwir ysgol 3-19 ac mae hyn yn destun balchder mawr. Mae'r deilliannau cadarnhaol o fewn yr adroddiad yn adlewyrchu gwaith caled ein staff ymroddgar ac hefyd yn dyst i'r disgyblion sy'n gweithio'n ddiwyd o ddydd i ddydd. Cymeraf y cyfle i longyfarch y staff a'r disgyblion ac hefyd i ddiolch yn ddiffuant iawn i aelodau'r corff llywodraethol am eu cefnogaeth triw ers y cychwyn. Diolch i chi rieni a gofalconwyr am eich cefnogaeth yn ogystal a mawr obeithiaf y cewch foddhad wrth ddarllen yr adroddiad canmoladwy hwn.

Prif gryfderau o fewn yr Adroddiad

Dysgu

Drwyddi draw, mae'r rhan fwyaf o ddisgyblion yn gwrandio yn ofalus ar gyflwyniadau ac ar gyfarwyddiadau athrawon ac mae llawer ohonynt yn gwrandio'n astud ar gyfraniadau eu cyfoedion. Mae llawer o'r disgyblion yn siarad Cymraeg yn rhugl, gan fynegi eu hunain yn eglur a hyderus. Mae llawer o'r disgyblion yn datblygu dealltwriaeth bynciol gadarn. Maent yn adalw gwybodaeth flaenorol yn llwyddiannus ac yn cymhwyso eu gwybodaeth a'u dealltwriaeth yn llwyddiannus i gyd-destunau newydd.

Lles ac Agweddau at Ddysgu

Mae gan y rhan fwyaf o ddisgyblion agweddau cadarnhaol at fywyd ysgol, ac mae llawer yn datblygu medrau cymdeithasol cryf wrth ryngweithio gyda staff, ymwelwyr a chyfoedion. Mae'r rhan fwyaf o ddisgyblion yn gwrandio'n barchus ar athrawon a'u cyfoedion, yn rheoli eu hymddygiad a chanolbwyntio'n dda mewn gwersi, gan ddangos parch tuag at eraill.

Mae disgyblion, gan gynnwys y rhai ag anghenion dysgu ychwanegol, yn elwa ar gyfleoedd i ddatblygu eu medrau arwain ac i gymryd cyfrifoldebau mewn amrywiol fforymau disgyblion fel y 'Fforwm Cydraddoldeb'. Mae disgyblion yn rhannu gwybodaeth fuddiol â llywodraethwyr am agweddau gwahanol o waith yr ysgol yn rheolaidd. Mae'r disgyblion hyn yn cyflawni eu rolau'n angerddol a chydag aeddfedrwydd, gan ddatblygu medrau personol a chymdeithasol gwerthfawr.

Addysgu a Phrofiadau Dysgu

Mae'r wefan 'Dysgu ac Addysgu' gynhwysfawr yn cynnwys lluo o adnoddau pwrpasol ar gyfer datblygu dulliau addysgu ac mae gan athrawon ddealltwriaeth dda o'u meysydd dysgu arbenigol. Maent yn sefydlu awyrgylch weithgar a chadarnhaol yn yr ystafell ddosbarth. Maent yn gefnogol o'r disgyblion, yn annog eu cyfraniad a'u dyfalbarhad ac yn canmol eu hymdrechion.

Mae'r ysgol yn hyrwyddo Cymreictod a hybu'r defnydd o'r Gymraeg yn egniol a defnyddir systemau megis 'tocynnau iaith' i wobrwyo defnydd o'r iaith yn y dosbarthiadau ac yn gymdeithasol. Mae'r ysgol yn hyrwyddo'r Gymraeg yn llwyddiannus drwy gyfres o ddigwyddiadau a gweithgareddau amrywiol fel yr Eisteddfod ysgol, dathlu diwrnod miwsig Cymru a chwarae 'trac yr wythnos'.

Gofal, Cymorth ac Arweiniad

Mae'r ysgol yn blaenoriaethu lles disgyblion a staff ac yn llwyddo i greu amgylchedd dysgu gefnogol. Mae gan staff adnabyddiaeth dda o'r disgyblion ac maent yn meithrin perthynas waith gynhaliol. Mae'r ysgol yn cydweithio ag asiantaethau allanol yn fwriadus er mwyn sicrhau bod y disgyblion mwyaf bregus yn derbyn cefnogaeth sydd yn ymateb i'w hanghenion.

Mae'r cydlynnydd anghenion dysgu ychwanegol (CADY) a'r tîm ADY yn cefnogi disgyblion yn effeithiol ar draws yr ysgol. Mae'r tîm yn darparu hyfforddiant amserol i staff er mwyn sicrhau eu dealltwriaeth o'r dulliau mwyaf effeithiol i gynllunio ar gyfer disgyblion gydag ADY. Mae staff yn darparu rhaglenni cefnogi gwerthfawr i ddisgyblion unigol a grwpiau bychain i ddatblygu eu medrau cymdeithasol, llythrennedd a rhifedd.

Arweinyddiaeth

Mae gan y Prifathro weledigaeth glir ar gyfer yr ysgol sy'n seiliedig ar gydweithio fel un gymuned i annog uchelgais a meithrin parch. Gyda'i dîm arwain, mae'n llwyddo i wireddu'r dyhead o greu ethos Cymreig amlwg ar draws yr ysgol, a chreu diwylliant cadarn o ddiogelu. Mae arweinwyr yn cynnal timau sy'n cydweithio'n effeithiol gyda'i gilydd ar draws yr ysgol. O ganlyniad, mae gan yr holl staff ddealltwriaeth addas o flaenoriaethau lefel uchel yr ysgol, fel yr angen i hyrwyddo Cymreictod a lles disgyblion. Mae arweinwyr yn darparu ystod o gyfleoedd gwerthfawr i athrawon gyd-drafod, gyd-gynllunio a gwneud ymchwil ar gyfer gwella eu hymarfer. Yn sgil hyn, mae ansawdd yr addysgu ar draws yr ysgol yn dda ac mae hyn yn cael effaith gadarnhaol ar gynnydd disgyblion yn eu gwybodaeth bynciol a'u llythrennedd.

Argymhellion

A1 Miniogi'r hunanwerthuso a chynllunio gwelliant fel bod gwell ystyriaeth o effaith y ddarpariaeth ar safonau a chynnydd disgyblion

A2 Cryfhau'r arweinyddiaeth strategol ar gyfer y meysydd gwella a adnabuwyd yn yr adroddiad gan gynnwys darpariaeth ar gyfer datblygu medrau rhifedd a digidol disgyblion

A3 Ehangu'r profiadau cwricwlaidd yng Nghyfnodau Allweddol 3 a 4 er mwyn diwallu anghenion yr holl ddisgyblion a sicrhau eu bod yn ymgysylltu'n gadarnhaol â'u dysgu

A4 Gwella presenoldeb

Y camau nesaf

Ni fydd Estyn yn ail-ymweld â'r ysgol.

Yn dilyn y drefn arferol ar ôl arolwg llawn, bydd yr ysgol yn llunio cynllun gweithredu i fynd i'r afael â'r argymhellion o'r arolygiad.

Dolen i'r Adroddiad Llawn

<https://www.estyn.llyw.cymru/system/files/2023-05/Adroddiad%20arolygiad%20Ysgol%20Garth%20Olwg%202023.pdf>

Ysgol Garth Olgw - Cydweithio Fel Un Gymuned